

Akilerarusiinernik Aalajangiisartut aalajangiinerat

Kinaassutsimik uppernarsaaneq 2019-5602

Piffissaq aalajangiiffiusoq maaji 2019

Aalajangiinerup tamanut saqqummiunneqarnera:

Ukioq isertitaqarfiusoq 2017

Sammissaq: Akileraarutit

Sammissami oqaatsit atorneqartut: Utoqqalinersiat, utoqqalinersiassanut akiliutinut tapiissutit
- tunniussinissamut akornutit

Eqikkaaneq

Utoqqalinersiassanut akilersuinernut tapiissutit pillugit naammagittaalliuut. Akileraartarnermut Aqutsisoqarfimmi naammagittaalliuuteqartoq tapiissutissanik qinnuteqaateqarami aningaasanik tunniussinissamut aningaaserivimmi kontuni paasissutissiisutigisimanngikkaa innersuussutigalugu Akileraartarnermut Aqutsisoqarfimmi tapiissutit itigartitsissutigineqarput.

Akilerarusiinernik Aalajangiisartut naammagittaalliuuteqartoq isumaqatigaat, tassami aningaaserivimi konto pillugit paasissutissiinnginneq akiliuteqarnissamut taamaallaat akornutaammat, tamatumalu naammagittaalliuuteqartup tapiissutisitinneqarnissaanut allannguutaanngimmat. Piffissaq aningaasat tunniunneqarfissaat Akilerarusiisarnernik Aalajangiisartut paasissutissanik amigaatigineqartunik pissarsinissaasa tungaanut taamaallaat kinguartinneqarput.

Suliassami pissutsit piviusut

Naammagittaalliuuteqartoq utoqqalinersiassanut akilersuinissamut tapiissutinik qinnuteqaateqarsimavoq. Qinnuteqaat ugguuna tunniunneqarpoq; www.sullissivik.gl. Nunani allani utoqqalinersiassat il.il. pillugit paasissutissat oqaatigineqarsimapput kisianni tapiissutinik akiliuteqarnissamut aningaaserivimmi konto pillugu paasissutissat amigaatigineqarlutik.

Akileraartarnermut Aqutsisoqarfimmit paasissutissat amigaatigineqartut allakkatigut naammagittaalliuuteqartumut piupaneqarsimapput. Tamatuma kingorna Akileraartarnermut Aqutsisoqarfimmit paasissutissat amigaatigineqartut nassiunneqarnissaat nukingisaarutigineqarput. Tamanna ilutigalugu paasissutissat pigineqartut tunngavigalugit aalajangiisoqassasoq naammagittaalliuuteqartoq paasitinneqarpoq, atortussat piupaneqartut piffissarititaasup qaangiunnerani tiguneqarsimanngippata.

Paasissutissat figuneqarsimanngillat tamatumalu kingorna Akileraartarnermut Aqutsisoqarfimmi tapiissutit pillugit qinnuteqaat itigartitsissutigineqarpoq.

Naammagittaalliuuteqartup paasinninnera

Akilerartarnermut Aqutsisoqarfimmi aalajangiineq tullinnguuttut makku tunngavilersuutigalugit naammagittaalliutigineqarpoq:

- Piffissami Akilerartarnermut Aqutsisoqarfimmit paasissutissanik noqqaalluni allakkanik nassiussiffiata nalaanni Kalaallit Nunaanniissimangitsoq taamaattumillu allakkat nassiunneqartut tigusimangikkai.
- Maannakkut aningaasanik tunniussinissamut atugassamik konto pillugu paasissutissat amigaatigineqartut nassiutissagai.

Inatsisitigut malittarisassanut inatsisitigullu periaatsinut innersuussinerit

Utoqqalinersiassanut akilersuinernut tapiissutit:

2016-imi Inatsisartut Aningaasarsianit akileraarutit pillugit Inatsisartut inatsisaat nr. 7, 6. juni 2016-imeersoq akuersissutigaa. Tamatumani utoqqalinersiassat Kalaallit Nunaanni katersorneqartut akileraaruserneqartarnerat aamma Kalaallit Nunaanni akileraaruserneqartalernissaat siunertarineqarluni.

Inatsisartut inatsimmi § 2-mi ikaarsaariarnermik aaqiineq akuersissutigaa. Piffissami 2017 – 2021-mi Namminersorlutik Oqartussat utoqqalinersiassanut akilersuutininut Aningaasarsianit akileraarutit pillugit Inatsisartut inatsisaat nr. 12, 2. november 2006-imeersumi § 39 a, imm. 1 aamma 2-mut ilaatinneqartunut tapiissuteqartarput.

Elektroniskiusumik ugguuna "Min Skat", www.Sullissivik.gl, imaluunniit ugguuna pension@nanoq.gl. qinnuteqaammik nassiussinikkut tapiissutinik qinnuteqaateqartoqarsinnaavoq. Tamanna ilutigalugu nammineerluni utoqqalinersiassanut akiliutaasimasut uppernarsaatitaat aamma nassiunneqassapput.

Qinnuteqaateqarnissamut immersuiffissaq paasissutissanik tullinnguuttunik makkuninnga immersorneqassaaq:

- Ateq
- Inuup nr.
- Utoqqalinersiassanut nammineerluni akiliutaasarsimasut pillugit paasissutissat
- Sulisitsisup utoqqalinersiassanut akiliutigisarsimasai pillugit paasissutissat
- Aningaaserivimmi konto pillugit paasissutissaq
- Ulloq atsiernerlu

Akileraarutinit utertoortissanik akiliinissamut il.il. aningaaserivimmi konto:

Aningaaserivimmut checkit atorunnaarsinneqalernerisa malitsigisaanik Akileraaruserinermik ingerlatsineq pillugu Inatsisartut inatsisaata nr. 32, 28. novembari 2016-imeersumi § 46 s ivertinneqarpoq.

Tamatuma kingorna akileraartartup akileraarutininik akiliivallaarsimanermini utertoortissanut, akitsuutininut il.il. Akileraaruserinermik ingerlatsisunit ikisiffigineqarsinnaasumik aningaaserivimmi kontoqarnissaq pisussaaffigilerpaa. Akileraaruserinermik ingerlatsisunut saaffiginnittarualarluni

saaffigineqariartaraluarlunilu aningaaserivimmi kontumik ikisiffigineqarsinnaasumik innersuussinngippat taava akileraarutitut, akitsuutitut, ernianut ajunngitsorsiasanut il.il. akilivallaarsimanerni utertoortissaagaluit ukiut tallimat qaangiukkaangata Nunatta Karsianut tuttarput.

§ 46 a. Akileraarutaavallaartunik, ernianik, ajunngitsorsiasanik assigisaannilluunniit akiliinermi danskit kr.-inik, akileraartartup kontumut innersuussaanut aningaaserivimmiittumut pisarpoq. Taaneqartutut akileraartartoq nammineq nalunaarsuinikkut, utertoormissamut qinnuteqarnikkut imaluunniit kingusinnerusukkut kontumik innersuussisinnaavoq. Kontumut innersuunneqartumut akiliinermi akileraartarnermut ingerlatsivik akisussaasuujunnaartarpoq.

Imm. 2. Kontumik aningaaserivimmi Danmarkimi, Savalimmiuni imaluunniit Kalaallit Nunaanniinngitsumi innersuussisoqarsimappat, akiliinermut atatillugu aningaasartuutaanerusunik aningaasanit ilanngaasoqarsinnaavoq. Aningaasat nuutassat aningaasartuutinit ikinneruppata, akileraartarnermut ingerlatsiviup aningaasat kontumut innersuussamut ikinningsuinnarsinnaavai. Kontunut bankini Danmarkimiinngitsuni, Savalimmiuniinngitsuni imaluunniit Kalaallit Nunaanniinngitsuni akiliinerit piffissaq eqqorlugu akiliinertut isigineqartassapput, aamma tiguisussap nunami akiliinerit assigisaasa kingunerannilluunniit tigugaluarpagit, ulloq taanna kontunut Kalaallit Nunaanniittunut akiliinermi assinganik sullinneqarsimappata, taakkulu Kalaallit Nunaanniittut piffissaq eqqorlugu aningaasat tiguppatingit.

Imm. 3. Akileraartartoq siusinnerusukkut kontumik innersuussisimappat, akileraartarnermut ingerlatsiviup akileraartartumut nammineerluni nalunaarsuiffissakkut allakkakkulluunniit nalunaarutininik allanik nassiusamigut oqaatigisinnaavaa, akileraarutaavallaartut kontumut sumut ikineqassanersut, akileraartartoq kontumik allamik innersuussinngippat. Akileraartartoq kontumik allamik innersuussinngippat, nammineerluni nalunaarsuiffissami il.il. kontumut taaneqartumut ikineqassapput, tamatumuunalu akileraartarnermut ingerlatsivik akisussaafferutissalluni.

Imm. 4. Akileraartarnermut ingerlatsiviup akileraarutaavallaartut il.il. imm. 1-imi imaluunniit 2-mi taaneqartutut kontumut akilersinnaanngippagit, akileraartarnermut ingerlatsiviup ullormit akiliisinnaaffianit, akileraartartumut ernialersuisoqassanngilaq.

Imm. 5. Akileraartarnermut ingerlatsiviup akiliisussaaffianit ukiut 5 qaangiuppata, akileraartarnermut ingerlatsivik imm. 1- 3-mi taaneqartutut kontumut suli akiliisinnaanngippat, akileraartartup akileraarutaavallaartunik, ernianik, ajunngitsorsiasanik assigisaannilluunniit piumasaqarsinnaanini annaassavaa. Piumasaqaataasinnaasut uuma siuliani taaneqartut piumasaqaataasinnaajunnaartut Nunatta karsianut ikineqassapput.

Akileraarusiinernik Aalajangiisartut naliliineri tunngavilersuutaalu

Tunngavilersuutigineqartut:

- naammagittaalliuuteqartoq qinnuteqaateqarnissap qaangiutinnginnerani tapiissutissanik qinnuteqaateqarsimasoq
- naammagittaalliuuteqartup § 39 a imm. 1 aamma 2-mi utoqqalinersiaqalernissamut piumasaqaataasut naammassisimagai, taakkulu naammassineqarsimappata utoqqalinersiasanut akiliinermi tapiissutitsisoqarsinnaavoq, Akileraartarnermut Aqutsisoqarfimmi akuerineqartoq.
- naammagittaalliuuteqartup sulisitsisuni kisimi utoqqalinersiasanut akilersuisuusimasoq.
- konto pillugu paasissutissat tunniunneqannginnerat pissutigalugu tapiinissamut Akileraartarnermut Aqutsisoqarfimmi itigartitsissutigineqarsimasoq.

Tapiissutisinissamut piumasaqaatit naammassineqarsimapput taamaattumillu Akileraartarnermut Aqutsisoqarfimmi utoqqalinersiasanut tapiissutissanik itigartitsinera eqqortuunngitsaq.

Aningaaserivimmi konto pillugu paasissutissaqannginneq taamaallaat akiliteqarnissamut akornutaavoq, tamannali naammagittaalliuuteqartup tapiissutisitinneqarsinnaatitaanerani allannguinngilaq. Akileraartarnermut Aqutsisoqarfimmi paasissutissat amigaatigineqartut pissarsiarinissaasa tungaannaanut tapiissutissanik akiliinissaq kinguartinneqarpoq tamannalu Akileraarusiinernik Aalajangiisartunut naammagittaalliummik nassitsinermut pissutaasoq.

Akileraarusiinernik Aalajangiisartut aalajangiinerat

Naammagittaalliuuteqartup nunani allani utoqqalinersiasat ilaannut akilersuinermini tapiissutisinissaminut piumasaqaatit naammassisimmagat naammagittaalliuuteqartup

naammagittalliutaa akuersarneqarpoq. Aningaaserivimmi konto pillugu paasissutissat amigaataasut pissarsiarineqarnissaasa tungaannaanut tapiissutissanik tunniussinissaq kinguartinneqarpoq.

Inatsisinut innersuussineq: Aningaasarsianit akileraarutit pillugit Inatsisartut inatsisaat nr. 7, 6. juni 2016-imeersumi § 2
Akileraaruserinermik ingerlatsineq pillugu Inatsisartut inatsisaata allangortinneqarneranik Inatsisartut inatsisissaat nr. 32, 28. november 2016-imeersumi § 46 a ivertinneqarpoq.